

Latgolys Radeja: "Asam gaisā!"


Tikai gondereiž godu atpakaļ – 2005. goda 10.septembrī Fr.Trasuna muzejā "Kolnasāta" Sakstagola pogostā iz jaunys Latgolys regionaluos radejis plānuošonys seminaru pulcējēs ap 30 aktīvu cylvāku nu dažaidom Latgolys pusēm. Laiks ir paguojs pīpīldeits - daudz dorba īguldeits, daudz ideju realizāts, i jau ituo gods 11. jūlī "Latgolys Radeja" uzsuoce raideit sovu programu dzeivajā ēterā. Pyrmuos tīšraidis nedeļuos klauseituoji gondereiž vysā Latgolys teritorejā frekvencēs 103.0 FM (Rēzeknē) i 95.2 FM (Daugovpilī) var klauseitīs vairuoku dīdžeju izvēlātū muzyku, sekuot leidza ziņom, sarunom ar radejis gaškom i gostim, kai ari jimt daleibu konkursūs i tikt pi jauku baļveņu.

Jau īprīkšējā "Katōļu Dzeivis" numurā beja plaša informaceja par "Latgolys Radejis" mierkim, plānuotū programu, deļ tam šūreiz par paveiktū i par nuokūtnis īcerem iz sarunu aicynuots SIA "MG Latgolas Bolss" direktors **Valdis Labinskis**.

- Kas ir tī faktori, kuri Jius īrūsnyuoja izveidot radeju taišni Latgolā?

- "Latgolys Radeju" veiduoju deļ tam, ka pats asmu nu Latgolys. Ar itū nūvodu asmu saisteits, ite dzeivoju i gribu te kū dareit. Latgolā ir ari specifiski apstuokļi. Pyrmkuort, šeit ir vysvairuok atteisteita regionaluo identitate, kas cytūs nūvodūs nav tik izteikta.

Ūtrkuort, vysleluokuo nūzeime ir latgalīšu volūdai. Pat tī cylvāki, kuri tū nalītoj, tūmār dzeivoj vidē, kur tei skan. I taišni volūdys vaicuojumi mani mudynuoja dūmuot par radio izveiduošonu. Tai kai maņ jau ir pīredze, dorbojūtīs masu medijūs, tod jau ogruok gribieju taiseit kaidu žurnalu voi laikrokstu. Tod apsvieru, ka volūdus vysvīgluok tyvynuot cylvākim voi nu ar



radeju, voi ar televizeju. Raksteituos volūdys lītuoituoju skaits napasalelynoj, deļ tam, ka ir problemys ar rokstu volūdys puormontuošonu, bet ar dažaidūs nūvodūs runuotū volūdus taidu problemu nav. Ar "Latgolys Radejis" storpnīceibu var nūstyprynuot, jo na rokstu volūdys, tod vysmoz dažaiduos Latgolys pīlsātuos i pogostūs runuotuos volūdys lītuošonu.

Uzskotu, ka volūda ir boguoteiba i vierteiba. Taipat kai pļovā ir daudz dažaidu puču, tai ari pasaule kliust interesantuoka, ja cylvāki līto dažaidys volūdys.

Treškuort, jau agruok beju aizaruovs ar sabīdriskajom aktivitatem, i ari tagad gribīs dareit kū sabīdreibys lobā, īguldūt sovu naudeņu, lai cylvākim byutu dorbs i lobums. Pī tam ar radeju var sasnīgt daudzys cylvākus.

- "Latgolys radejā" struodoj cylvāki nu dažaidu Latgolys vītu, kai Jius verotēs iz dažaidu izlūksņu lītuošonu radejā?

- Pīdzimu Sibirejā. Lai gon tāva sāta maņ Jersikā, kur niu asu izcieļs muoju sovai saimei. Ogruok dzeivoju Vuocējā, latgalīšu volūdus asmu vuicejīs nu gruomotu. Radejis leidzstruodnīki līto latgalīšu volūdus kai dzymtū. Leluokuo daļa runoj da-

žaiduos izlūksnēs. Ir jau ari kritiki, kas uzskota, ka radeja sagraun latgalīšu literarū volūdus. Es tai nadūmoju. Tys ir na radejis, bet vajsts uzdavums – nūturēt latgalīšu literarū volūdus. Mes gribim, lai cylvāki lobuok justūs. Itamā gadejumā juoīt vīnkuoršuoks ceļš – juoizmontoj tys, kas ir cylvāki, kas runoj sovā izlūksnē. Pījamūt dorbbā cylvākus, vierūs, kab jī byutu nu dažaidu Latgolys pušu – Dagdys, Kuorsovys, Preilim, Rēzeknis, Daugovpīļs. Taidā veidā regions teik puorstuovāts plašuok.

- Pastuostīt par byutīskuokū, kas ir izdareits pādejuo mieneša laikā?

- Nu 9.juņa suocem skanēt ēterā nu raideituoja Rēzeknis rajona Greiškānūs. Nu 14.juņa myus jau varēja dzierdēt nu Daugovpīļs. 11.jūlī suocem skanēt dzeivajā ēterā. Sovukuort nu 21.juļa raidom stereo kvalitātē.

- Kas veļ ir juosasnīdz tyvuokajā laikā?

- Pyrmkuort, napīcīšams uzstuodeit raideituojus Bolvūs i Jēkabpilī.

Ūtrkuort, vajag izveidot programys shemu, lai ari klauseituoji zynuotu, kas i cikūs dzierdams radejis ēterā. Taipat ari paradzāta sadarbība ar radeju "Skonto", kas raideis myusu frekvencēs laikā nu 8:00 leidz 12:00. Tys paleidzēs palelynuot myusu atpazeistameibu Reigā.

Treškuort, juostruodoj pi leidzekļu pīsaistīs i reklamys, kai ari juoslādz sadarbībys leigumi ar pošvajdeibom, sabīdriskajom organizacejom i cytīm partnerim.

- Nūslādzūt sarunu, kū Jius gribīt vēlē "Katōļu Dzeivis" laseituojim?

Klausitēs "Latgolys Radeju"! Vieļeju, lai cylvāki byutu aktīvi ari sovu latgaliskū (na tikai religiskūs i kultury, bet ari ekonomiskūs) interešu aizstuoveibā. I vēļ svaireigi ir izateikt – naglobuot sova veidūkļa "zam deveņu atslāgu" – jo kū pasceisi publiski, tū lobuok sadzierdēs cyti.

- Paļdis par sarunu!

Anna Briška

